



საქართველოს მთავრობის განკარგულება

N306 2015 წლის 19 თებერვალი ქ. თბილისი

„აგროდაზღვევის“ პროგრამის დამტკიცების შესახებ

1. „საქართველოს მთავრობის სტრუქტურის, უფლებამოსილებისა და საქმიანობის წესის შესახებ“ საქართველოს კანონის მე-5 მუხლის „ვ“ ქვეპუნქტისა და „საქართველოს 2015 წლის ბიუჯეტის შესახებ“ საქართველოს კანონის მე-14 მუხლის 10.1.10 პუნქტის შესაბამისად, დამტკიცდეს თანდართული „აგროდაზღვევის“ პროგრამა.

2. ამ განკარგულების პირველ პუნქტში აღნიშნული „აგროდაზღვევის“ პროგრამისა და საქართველოს მთავრობის 2014 წლის 19 აგვისტოს №1462 განკარგულებით დამტკიცებული „აგროდაზღვევის“ პროგრამის დაფინანსება განხორციელდეს „საქართველოს 2015 წლის ბიუჯეტის შესახებ“ საქართველოს კანონით გათვალისწინებული ქვეპროგრამიდან „აგროდაზღვევის უზრუნველყოფის ღონისძიებები“ (პროგრამული კოდი: 37 01 10).

3. ამ განკარგულებით დამტკიცებული „აგროდაზღვევის“ პროგრამის მოქმედება (გარდა პროგრამის მე-3 მუხლისა) არ გავრცელდეს საქართველოს მთავრობის 2014 წლის 19 აგვისტოს №1462 განკარგულებით დამტკიცებულ აგროდაზღვევის პროგრამის

საფუძველზე გაცემულ სადაზღვევო პოლისებზე.

4. „აგროდაზღვევის“ პროგრამის განხორციელება ეთხოვოს არასამეწარმეო (არაკომერციული) იურიდიულ პირს - სოფლის მეურნეობის პროექტების მართვის სააგენტოს.

პრემიერ-მინისტრი



ირაკლი ღარიბაშვილი



„აგროდაზღვევის“ პროგრამა

მუხლი 1. ზოგადი დებულებები

1. წინამდებარე „აგროდაზღვევის“ პროგრამა (შემდგომში - პროგრამა) არეგულირებს ურთიერთობებს, რომელიც წარმოიშობა საქართველოს ტერიტორიაზე სასოფლო-სამეურნეო კულტურების მოსავლის დაზღვევასთან დაკავშირებით (სეტყვა, ჭარბი ნალექი, ქარიშხალი და საშემოდგომო ყინვა) მზღვეველს, დამზღვევს/მოსარგებლეს და სააგენტოს შორის.

2. პროგრამის მიზანია:

- ა) აგროსექტორში სადაზღვევო ბაზრის განვითარება;
- ბ) სასოფლო-სამეურნეო საქმიანობის ხელშეწყობა;
- გ) სასოფლო-სამეურნეო სფეროში დასაქმებული პირების კონკურენტუნარიანობის ამაღლება;
- დ) სასოფლო-სამეურნეო საქმიანობით დაკავებული პირებისთვის შემოსავლის შენარჩუნება და რისკების შემცირება.

3. პროგრამის განმახორციელებელია ა(ა)იპ-სოფლის მეურნეობის პროექტების მართვის სააგენტო (შემდგომში - სააგენტო).

4. პროგრამის განხორციელების მიზნით, სააგენტო აფორმებს ხელშეკრულებებს საქართველოში კანონმდებლობით დადგენილი წესით ლიცენზირებულ შესაბამის სადაზღვევო კომპანიებთან.

5. მზღვეველს, დამზღვევსა და სააგენტოს შორის ურთიერთობები (როგორიცაა, მზღვეველისა და დამზღვევის უფლება-მოვალეობები, ზიანის რეგულირების პროცესი და სხვა) განისაზღვრება წინამდებარე დადგენილებითა და სააგენტოსა და სადაზღვევო კომპანიებს შორის გაფორმებული ხელშეკრულებით.

6. პროგრამის ფარგლებში სადაზღვევო პოლისის გაცემის ბოლო ვადაა 2015 წლის 10 დეკემბერი. ამასთან, ამ პროგრამის საფუძველზე წარმოშობილი ვალდებულებები ძალაში რჩება მათ სრულად და ჯეროვნად შესრულებამდე.

მუხლი 2. ტერმინთა განმარტება

წინამდებარე პროგრამაში გამოყენებულ ტერმინებს აქვს შემდეგი მნიშვნელობა:

ა) მზღვეველი - იურიდიული პირი, რომელიც შექმნილია სადაზღვევო საქმიანობის განხორცილებისათვის, საქართველოს კანონმდებლობით დადგენილი წესით მიღებული აქვს დაზღვევის შესაბამისი (არასიცოცხლის) სახეობის ლიცენზია;

ბ) დამზღვევი - ფიზიკური პირი ან იურიდიული პირი, რომელსაც საკუთრებაში, სარგებლობაში, ან ფაქტობრივ მფლობელობაში გააჩნია არა უმეტეს 5 ჰა (ხორბლის მოსავლის დაზღვევის შემთხვევაში არა უმეტეს 15 ჰა) ფართობის ჩათვლით სასოფლო-სამეურნეო დანიშნულების მიწის ნაკვეთი და გაფორმებული აქვს დაზღვევის ხელშეკრულება. პროგრამით გათვალისწინებული მიწის ფართობის ოდენობის შეზღუდვა არ

ვრცელდება სასოფლო-სამეურნეო კოოპერატივზე;

გ) მოსარგებლე - დამზღვევი ან/და დამზღვევის მიერ განსაზღვრული ბანკი, მიკროსაფინანსო ან/და საკონსულტო ინსტიტუტი, რომელიც იღებს სადაზღვევო ანაზღაურებას;

დ) სადაზღვევო პოლისი - მზღვეველის მიერ გაცემული ხელმოწერილი საბუთი, მოწმობა დაზღვევის ხელშეკრულების შესახებ, რომელიც გაიცემა დამზღვევის მიერ შევსებული დაზღვევის განაცხადის საფუძველზე;

ე) დაზღვევის ობიექტი - სადაზღვევო პოლისში მითითებული სასოფლო-სამეურნეო კულტურის მოსავალი, რომელიც მოიყვანება პოლისში მითითებულ მიწის ნაკვეთზე;

ვ) დაზღვეული სასოფლო-სამეურნეო კულტურა - სასოფლო სამეურნეო კულტურა, რომელიც მითითებულია სადაზღვევო პოლისის „სასოფლო-სამეურნეო კულტურის“ გრაფაში;

ზ) დაზღვევის პერიოდი - სადაზღვევო პოლისში მითითებული პერიოდი, რომლის განმავლობაშიც დაზღვევა ძალაშია, პროგრამის განსაზღვრული პირობების/შეზღუდვების და მოცდის პერიოდის გათვალისწინებით;

თ) მოცდის პერიოდი - სადაზღვევო პოლისის გაცემის თარიღიდან 5 დღიანი უწყვეტი კალენდარული პერიოდი, რომლის განმავლობაში მომხდარი სადაზღვევო რისკის შედეგად მიყენებული ზიანი არ ექვემდებარება ანაზღაურებას;

ი) დაზღვევის განაცხადი - მოსავლის დაზღვევის განაცხადი, რომელსაც ავსებს დამზღვევი დაზღვევის ხელშეკრულების დასადებად და რომელიც წარმოადგენს დაზღვევის ხელშეკრულების განუყოფელ ნაწილს;

კ) დაზღვევის ხელშეკრულება – დამზღვევსა და მზღვეველს შორის დაზღვევის განაცხადის საფუძველზე გაფორმებული ხელშეკრულება, რომლის საფუძველზეც გაიცემა სადაზღვევო პოლისი;

ლ) სადაზღვევო ლიმიტი - სადაზღვევო პოლისით დადგენილი მზღვეველის პასუხისმგებლობის მაქსიმალური ოდენობა, მაგრამ არა უმეტეს წინამდებარე პროგრამით შესაბამისი სასოფლო-სამეურნეო კულტურისათვის განსაზღვრული ნორმატიული მოსავლიანობისა (დანართი №1) და აგრო-კულტურების ნორმატიული ფასების გათვალისწინებით განსაზღვრული ოდენობა;

მ) დაზღვეული ტერიტორიის ნაწილის სადაზღვევო ლიმიტი - სადაზღვევო ლიმიტის პროცენტი, რომელიც განისაზღვრება დაზღვეული ტერიტორიის ნაწილის შეფარდებით დაზღვეულ ტერიტორიასთან;

ნ) დაზღვეული ტერიტორია (ნაკვეთი) - მიწის ნაკვეთი, რომელზეც განთავსებულია დაზღვევის ობიექტი, რომლის მონაცემები (საკადასტრო კოდი, ან/და GPS კოორდინატი, ან/და აზომვითი ნახაზი), ადგილმდებარეობის მისამართი და ფართობი მითითებულია სადაზღვევო პოლისში დამზღვევის მიერ წარდგენილ ინფორმაციაზე დაყრდნობით, რომლის ინფორმაციულ უტყუარობაზეც სრულად პასუხისმგებელია დამზღვევი, გარდა GPS კოორდინატის მონაცემებისა, რომლის მიწოდებაზეც პასუხისმგებელია მზღვეველი;

ო) ფიქსირებული სადაზღვევო ტარიფი – წინამდებარე დადგენილების №1 დანართით განსაზღვრული პროცენტული განაკვეთი;

პ) სადაზღვევო პრემია - თანხა, რომელიც გადაიხდება სადაზღვევო მომსახურების გაწევისათვის. ამასთან, პრემიის ნაწილი გადახდილი

უნდა იყოს დამზღვევის მიერ პოლისის გაცემის მომენტისათვის ერთჯერადად და სრულად, ხოლო დარჩენილი ნაწილი სააგენტოს მიერ გადაიხდება წინამდებარე პროგრამით განსაზღვრული წესით. სასოფლო-სამეურნეო კოოპერატივის შემთხვევაში, სააგენტოს მიერ ერთ დამზღვევზე/მოსარგებლეზე გადასახდელი პრემიის ოდენობა არ უნდა აღემატებოდეს 50 000 ლარს;

ჟ) ფრანშიზა - არაანაზღაურებადი მინიმუმი, რომლის გამოქვითვა ხორციელდება თითოეული სადაზღვევო შემთხვევისათვის. ფრანშიზა გამოითვლება როგორც სადაზღვევო ლიმიტის 10%, ან მისაღები მოსავლის ნორმატიულ ფასზე გამრავლებით მიღებული ღირებულების 10%. მითითებული ორი სიდიდიდან გამოიქვითება ის ოდენობა, რომელიც უფრო მცირე იქნება;

რ) სადაზღვევო რისკი - ამ პუნქტში მითითებული მოვლენა, რომლის დადგომის შედეგად მიყენებული ზიანი ექვემდებარება მზღვეველის მიერ ანაზღაურებას წინამდებარე პროგრამით გათვალისწინებული წესით;

რ.ა) სეტყვა – ატმოსფერული ნალექები ყინულის წარმონაქმნების სახით (მცირე მარცვლიდან მსხვილი კვერცხისოდენა ზომის წარმონაქმნამდე), რომლებიც, როგორც წესი, ზაფხულში თან ახლავს კოკისპირულ წვიმას ან ჭიქა-ქუხილს. სეტყვა იწვევს სასოფლო-სამეურნეო კულტურების დაზიანებას ან განადგურებას მცენარეთა მიწისზედა ორგანოებზე უშუალო მექანიკური ზემოქმედების შედეგად;

რ.ბ) ჭარბი ნალექი – უხვი ნალექების დროს იმ მიწის ზედაპირის გადარცხვა, ან/და დატბორვა გრუნტის, ან/და შლამის (მიწა-წყლის), ან/და წყლის ნაკადით, რომელიც ჩვეულებრივ არ არის დაფარული წყლით. იწვევს მცენარეთა დაზიანებას ან/და განადგურებას მათ

მიწისქვეშა და მიწისზედა ნაწილებზე მექანიკური ზემოქმედების შედეგად, მათ მოგლეჯას ნიადაგიდან, ნიადაგის გამორეცხვას ან დაშლამიანებას. ასევე, იწვევს წყლის დაგუბებას სასოფლო-სამეურნეო სავარგულებზე, შედეგად მცენარეთა დაზიანებას, ან/და განადგურებას ფიზიოლოგიური პროცესების დარღვევის შედეგად;

რ.გ) ქარიშხალი – ქარი სიჩქარით 15მ/წმ. ან მეტი, რომელიც იწვევს მცენარეების გაძლიერებულ ტრანსპირაციას, ნიადაგის ზედა ფენების გამოშრობას, მცენარეების მექანიკურ დაზიანებებს;

რ.დ) საშემოდგომო ყინვა (მხოლოდ ციტრუსოვანი კულტურებისათვის) - 1 სექტემბრიდან 10 დეკემბრის ჩათვლით პერიოდში ტემპერატურის მკვეთრი ვარდნა, რომელსაც შედეგად მოჰყვება დაზღვეული ციტრუსოვანი კულტურის თბური დაზიანება ან განადგურება;

ს) სადაზღვევო შემთხვევა - სადაზღვევო რისკების ხდომილების შედეგად დაზღვევის ობიექტისათვის ზიანის მიყენება, რომლის საფუძველზეც, წინამდებარე პროგრამის თანახმად, წარმოიშობა მზღვეველის პასუხისმგებლობა, გასცეს სადაზღვევო ანაზღაურება;

ტ) მისაღები მოსავალი – მოსავალი, რომელიც მითითებულია სადაზღვევო შემთხვევის შესახებ აქტში, როგორც მოსავალი, რომელსაც დამზღვევი/ მოსარგებლე მიიღებდა, ადგილი რომ არ ჰქონდა სადაზღვევო რისკის ხდომილებას;

უ) დაზიანებული დაზღვეული ტერიტორიის (ნაკვეთის) დათვალიერების აქტი - დოკუმენტი, რომელიც დგება მზღვეველის (ან მზღვეველის მიერ მოწვეული ექსპერტი) მიერ და რომელსაც ხელს აწერს მზღვეველი და დამზღვევი, ან მოსარგებლე და რომლითაც დასტურდება, დაზიანებული დაზღვეული ტერიტორიის (ნაკვეთის)

მზღვეველის მიერ დათვალიერებისა და კონკრეტული შემთხვევის ხდომილებით გამოწვეული ზიანის ოდენობა. დაზღვეული ტერიტორიის დათვალიერების აქტი დგება ორ ეგზემპლიარად, რომელთაგან ერთი გადაეცემა დამზღვევს/მოსარგებლეს, ხოლო მეორე რჩება მზღვეველთან;

ფ) სადაზღვევო ანაზღაურების აქტი - დოკუმენტი, რომელიც დგება მზღვეველის მიერ და ხელს აწერს მზღვეველი და დამზღვევი/მოსარგებლე და რომელიც დგება დაზიანებული დაზღვეული ტერიტორიის (ნაკვეთის) დათვალიერების აქტ(ებ)ისა და ასეთი აქტ(ებ)ით დადგენილი ზიანის ოდენობისა და სხვა აუცილებელი დოკუმენტაციის საფუძველზე და განსაზღვრავს მზღვეველის მიერ სადაზღვევო შემთხვევის ხდომილების გამო გასაცემი სადაზღვევო ანაზღაურების თანხის ოდენობას; სადაზღვევო ანაზღაურების აქტი დგება ორ ეგზემპლიარად, რომელთაგან ერთი გადაეცემა დამზღვევს/მოსარგებლეს, ხოლო მეორე რჩება მზღვეველთან;

ქ) ნორმატიული მოსავლიანობა, ნორმატიული ფასი - წინამდებარე პროგრამის მიზნებისათვის თითოეული სასოფლო-სამეურნეო კულტურისათვის წინამდებარე პროგრამის №1 დანართით განსაზღვრული ნორმატიული მოსავლიანობა და ნორმატიული ფასი, რომლის ლიმიტს ზემოთ არ ხორციელდება დაზღვევა და არ გაიცემა სადაზღვევო ანაზღაურება;

ღ) სადაზღვევო ანაზღაურება- თანხა, რომელსაც მზღვეველი უხდის მოსარგებლეს დაზღვევის ხელშეკრულებით გათვალისწინებული სადაზღვევო შემთხვევის დადგომით გამოწვეული ზიანის ასანაზღაურებლად;

ყ) სააგენტო - არასამეწარმეო (არაკომერციული) იურიდიული პირი- სოფლის მეურნეობის პროექტების მართვის სააგენტო;

შ) პროგრამის საკონრდინაციო საბჭო - საქართველოს სოფლის მეურნეობის სამინისტროს მიერ დაფუძნებული ორგანო, რომელიც განახორციელებს წინამდებარე პროგრამის ფარგლებში წარმოშობილი დავების განხილვას.

მუხლი 3. სადაზღვევო ანაზღაურების პირობები

1. დაზღვევის ხელშეკრულების საფუძველზე, მზღვეველი ვალდებულია, სადაზღვევო ლიმიტის ფარგლებში და ფრანშიზის გამოკლებით, გასცეს სადაზღვევო ანაზღაურება დაზღვევის მოქმედების პერიოდში სადაზღვევო რისკის დადგომის შედეგად დაზღვევის ობიექტის დაზიანების შემთხვევაში წინამდებარე პროგრამით დადგენილი წესებისა და შეზღუდვების გათვალისწინებით.

2. სადაზღვევო შემთხვევის დარეგულირების წესი:

ა) სადაზღვევო შემთხვევის დადგომის შემთხვევაში, დამზღვევი/მოსარგებლე ვალდებულია, შეატყობინოს აღნიშნულის თაობაზე მზღვეველს 24 საათის განმავლობაში სატელეფონო ზარით, ხოლო, წერილობითი განაცხადით შეთანხმებულ ფორმატში, 5 სამუშაო დღეში, მათ შორის ელექტრონული სახით. დამზღვევის მხრიდან აღნიშნული ვადების დარღვევის შემთხვევაში, მზღვეველი თავისუფლდება ზიანის ანაზღაურების ვალდებულებისგან;

ბ) სადაზღვევო ანაზღაურება ხდება სადაზღვევო ანაზღაურების აქტის ხელმოწერიდან 15 სამუშაო დღეში;

გ) სადაზღვევო ანაზღაურების გადახდის ვადის დარღვევის შემთხვევაში, მზღვეველს ეკისრება სანქცია ყოველ ვადაგადაცილებულ

დღეზე ასანაზღაურებელი თანხის 0.1 %-ის ოდენობით მოსარგებლის მიმართ;

დ) იმ შემთხვევაში, თუ სანქციის თანხა გადააჭარბებს ზიანის ანაზღაურებისთვის განკუთვნილი თანხის 10 %-ს, მოსარგებლების უფლებამოსილია, მოსთხოვოს მზღვეველს ზიანის ანაზღაურება და შესაბამისი სანქციის გადახდა დაუყოვნებლივ.

3. ზიანის დარეგულირების პროცესში გასაფორმებელი დოკუმენტაცია:

ა) დაზიანებული დაზღვეული ტერიტორიის (ნაკვეთის) დათვალიერების აქტი - რომელიც შედგება სააგენტოსა და სადაზღვევო კომპანიებს შორის გაფორმებული ხელშეკრულებით განსაზღვრული ფორმისა და ვადების შესაბამისად;

ბ) სადაზღვევო ანაზღაურების აქტი - რომელიც შედგება სააგენტოსა და სადაზღვევო კომპანიებს შორის გაფორმებული ხელშეკრულებით განსაზღვრული ფორმისა და ვადების შესაბამისად.

4. სადაზღვევო შემთხვევის შედეგად დამდგარი ზიანის შეფასება თითოეული კულტურის მიხედვით მოხდება სააგენტოს მიერ შემუშავებული ზიანის შეფასების საერთო წესის მიხედვით, რომელიც განისაზღვრება სააგენტოსა და სადაზღვევო კომპანიებს შორის გაფორმებული ხელშეკრულების შესაბამისად.

5. დაზღვევის პროგრამის შესაბამისად ანაზღაურებას არ ექვემდებარება დაზღვევის ობიექტისათვის მიყენებული ზიანი, რომელიც გამოწვეულია:

ა) საყოველთაოდ აღიარებული სასოფლო-სამეურნეო და მოსავლის აღების პრაქტიკის (რომელიც სრულად შეესაბამება კონკრეტულ მიკრო – ზონას და აგრო კულტურას) დაუცველობით;

ბ) დაუზღვეველი რისკებით, მაშინაც კი, თუ ასეთი ზიანი დადგა სადაზღვევო რისკთან ერთად ან მასთან კავშირში. მიყენებული ზიანი ანაზღაურებული იქნება მხოლოდ იმ ნაწილში, რომელიც მიყენებულია უშუალოდ სადაზღვევო რისკ(ებ)ის შედეგად;

გ)დამზღვევის/მოსარგებლის განზრახი ქმედებით ან უხეში გაუფრთხილებლობით, მათ შორის დამზღვევის/მოსარგებლის მიერ განზრახ ან უხეში გაუფრთხილებლობით მოსავლის გადარჩენისა და შენარჩუნების მიზნით ყველა გონივრული ზომის გამოუყენებლობა ზიანის დადგომისას ან მის შემდეგ.

6. მზღვეველის მიერ ანაზღაურებას არ ექვემდებარება ასევე:

ა) ზიანი, რომელიც დადგა შემდეგი გარემოებების დროს, ასეთი გარემოებების ფონზე ან მათთან კავშირში:

ა.ა) დაავადებათა, მწერთა და მღრღნელთა გავრცელება, დაგვიანებული მწიფობა და სხვა;

ა.ბ) ზიანი, რომელიც არ აღემატება სადაზღვევო პოლისით გათვალისწინებულ ფრანშიზას;

ა.გ) სასოფლო-სამეურნეო კულტურისათვის მიყენებული დაზიანებები, თუ ასეთი დაზიანებები არ იწვევს ასეთი სასოფლო-სამეურნეო კულტურის მოსავლის დაღუპვას/განადგურებას/დანაკარგს;

ბ) ზიანი, რომელიც პირდაპირ ან არაპირდაპირ გამოწვეულია საომარი მოქმედებებით, სამოქალაქო ომით, მასობრივი არეულობით, საგანგებო ან საომარი მდგომარეობით, ტერორიზმით ან მისი ნებისმიერი გამოვლინებით, ისეთი სტიქიური/ბუნებრივი მოვლენებით, რომელიც არ წარმოადგენს წინამდებარე პროგრამით დაზღვეულ რისკებს, ასევე ამ გარემოებების დროს დამდგარი სადაზღვევო რისკებით გამოწვეული ზიანი.

მუხლი 4. დაზღვევის ხელშეკრულების დადების წესი და პირობები დამზღვევსა და მზღვეველს შორის ფორმდება დაზღვევის ხელშეკრულება დამზღვევის მიერ წარდგენილი განაცხადის საფუძველზე. წინამდებარე პროგრამის ფარგლებში დაიზღვევა მხოლოდ ისეთი მიწის ნაკვეთები (რომლებზეც განთავსებულია დაზღვევის ობიექტი), რომელთაც გააჩნიათ შესაბამისი მონაცემები: საკადასტრო კოდი, ან/და აზომვითი ნახაზი, ან/და GPS კოორდინატები და მისამართი. ამ მონაცემების წარდგენა ევალება დამზღვევს, გარდა GPS კოორდინატების მონაცემებისა, რომელსაც წარადგენს მზღვეველი.

მუხლი 5. მზღვეველის ანგარიშგება და სადაზღვევო პრემიის სუბსიდირება

1. მზღვეველი ვალდებულია, სააგენტოს ყოველი კალენდარული თვის დასრულებიდან მომდევნო თვის 10 (ათი) რიცხვამდე ელექტრონულად წარუდგინოს ანგარიშგება შესაბამის თვეში განხორციელებული დაზღვევის შესახებ.

2. ანგარიშგების ვადების დარღვევის შემთხვევაში, მზღვეველს აქვს შესაძლებლობა წინა თვეში გაცემული პოლისები წარადგინოს არა უგვიანეს მომდევნო თვის დასრულებიდან მომდევნო თვის 10 (ათი) რიცხვამდე.

3. მზღვეველის მიერ ამ მუხლის მე-2 პუნქტით განსაზღვრული ვადის დარღვევის შემთხვევაში, სააგენტო უფლებამოსილია უარი განაცხადოს ასეთი პოლისების საფუძველზე სადაზღვევო პრემიის მზღვეველისათვის გადახდაზე.

4. ანგარიშგება სავალდებულო წესით უნდა შეიცავდეს შემდეგ ინფორმაციას:

- ა) დამზღვევის სახელი, გვარი, პირადი ნომერი/იურიდიული პირის დასახელება, საიდენტიფიკაციო კოდი;
- ბ) გაცემული პოლისის ნომერი;
- გ) პოლისის გაცემის თარიღი;
- დ) დაზღვეული მიწის ნაკვეთის მდებარეობის აღმნიშვნელი ინფორმაცია: საკადასტრო კოდი, აზომვითი ნახატი, ან GPS კოორდინატები და მისამართი;
- ე) დაზღვეული მიწის ნაკვეთის ფართობი;
- ვ) დაზღვეული სასოფლო-სამეურნეო კულტურა და სადაზღვევო თანხა;
- ზ) დაზღვევის პერიოდი;
- თ) დამზღვევის მიერ გადახდილი სადაზღვევო პრემია;
- ი) სააგენტოს მიერ გადასახდელი სადაზღვევო პრემიის ოდენობა;
- თ) პოლისის ინდივიდუალური შტრიხ კოდი.

5. მზღვეველი ვალდებულია, ანგარიშგებით წარდგენილი პოლისები შესაბამისი დოკუმენტაციის (განაცხადი, დამზღვევის მიერ ხელმოწერილი შეთანხმება პროგრამაში მონაწილეობის შესახებ), მათ შორის, დამზღვევის მიერ თავისი წილი პრემიის გადახდის დამდასტურებელი ფინანსური დოკუმენტაციის თანდართვით (რომლის მიხედვითაც შესაძლებელი უნდა იყოს იდენტიფიცირება, რომელი პოლისის საფუძველზე იქნა გადახდილი), მატერიალური სახით წარუდგინოს სააგენტოს არა უგვიანეს ანგარიშგების წარდგენის თვის ბოლომდე.

6. სააგენტოს მიერ გადასახდელი სადაზღვევო პრემია (№1

დანართის შესაბამისად) გადახდას ექვემდებარება ამ მუხლის მე-5 პუნქტით გათვალისწინებული დოკუმენტაციის სრულყოფილი სახით მიღებიდან 30 კალენდარული დღის ვადაში. ამასთან, წინამდებარე პროგრამით განსაზღვრული სუბსიდირების წესი მოქმედებს იმ შემთხვევაში, თუ სადაზღვევო პოლისი გაყიდულია პროგრამის №1 დანართით განსაზღვრულ ფიქსირებულ ტარიფში.

7. იმ შემთხვევაში, თუ მზღვეველის მიერ წარდგენილი ანგარიშგება განხორციელებული დაზღვევის შესახებ შეიცავს მცდარ/არაზუსტ ან არასრულყოფილ ინფორმაციას, კერძოდ, GPS კოორდინატების, სადაზღვევო პრემიისა და პირადი მონაცემების შესახებ, მზღვეველს აღნიშნული ხარვეზის გამოსასწორებლად მიეცემა 5 (ხუთი) სამუშაო დღე.

8. თუ მზღვეველის მხრიდან არ მოხდა სააგენტოს მიერ მოთხოვნილი დამატებით ინფორმაციის წარდგენა დადგენილ ვადაში, სააგენტო უფლებამოსილია უარი განაცხადოს ასეთი სადაზღვევო პოლისის საფუძველზე სადაზღვევო პრემიის გადახდაზე, რის შესახებაც სააგენტო დამატებითი ინფორმაციის წარდგენის ვადის ამოწურვიდან არა უგვიანეს სამი სამუშაო დღისა წერილობით აცნობებს მზღვეველს დაჯარიმებისა (ჯარიმის ოდენობა განისაზღვრება თითოეულ პოლისზე 50 ლარის ოდენობით) და პრემიის გადახდაზე უარის საფუძვლის მითითებით თოთოეულ დაზღვევის ხელშეკრულებასთან/პოლისთან მიმართებაში.

9. იმ შემთხვევაში, თუ მზღვეველის მიერ წარდგენილ ანგარიშგებაში მითითებული ისეთი პოლისების 30 % ან მეტი, რომლებზეც მითითებულია GPS კოორდინატი, შეიცავს არასწორ GPS კოორდინატებს, ამასთან აღნიშნული არასწორი მონაცემების 70% -ში

მითითებული GPS კოორდინატი ცდომილებაშია ამავე მიწის ნაკვეთის ანგარიშგებაში მითითებულ ადგილმდებარეობის მისამართთან, სააგენტო უფლებამოსილია დამატებითი ვადის განსაზღვრის გარეშე უარი განაცხადოს ყველა ასეთი სადაზღვევო პოლისის საფუძველზე სუბსიდირებული სადაზღვევო პრემიის გადახდაზე.

10. იმ შემთხვევაში, თუ მზღვეველის მიერ მატერიალური სახით არასრულად არის წარდგენილი დოკუმენტაცია, სააგენტო მზღვეველს განუსაზღვრავს დამატებით ვადას არა უმეტეს 5 (ხუთი) სამუშაო დღით ასეთი დოკუმენტაციის წარდგენისათვის. იმ შემთხვევაში, თუ მზღვეველის მიერ აღნიშნული ვადა გაშვებული იქნება უშედეგოდ, სააგენტო უარს განაცხადებს შესაბამისი სადაზღვევო პოლისის საფუძველზე სადაზღვევო პრემიის გადახდაზე. ამასთან, თუ მზღვეველის მიერ მატერიალური სახით წარდგენილ დოკუმენტაციას თან არ დაერთვება დამზღვევის მიერ თავისი წილი სადაზღვევო პრემიის გადახდის დამადასტურებელი ფინანსური დოკუმენტი მოთხოვნილი სახით, სააგენტო დააჯარიმებს მზღვეველს თოთოეულ ასეთ პოლისზე ამავე პოლისით გათვალისწინებული სუბსიდირებული სადაზღვევო პრემიის ორმაგი ოდენობით.

11. სააგენტო უფლებამოსილია, ჯარიმის სახით დაკისრებული თანხები გამოქვითოს მზღვეველისათვის გადასახდელი ნებისმიერი ფულადი სახსრებიდან. თუ სააგენტოს მიერ არ ხორციელდება ჯარიმის გამოქვითვა, სააგენტოს მიერ დაკისრებული ჯარიმა მზღვეველის მიერ გადახდილ უნდა იქნეს მოთხოვნიდან არა უგვიანეს 10 სამუშაო დღისა.

12. სააგენტოს მიერ წინამდებარე მუხლით განსაზღვრული საფუძვლებით სუბსიდირებული სადაზღვევო პრემიის გადახდაზე უარის თქმა არ ათავისუფლებს მზღვეველს შეასრულოს დაზღვევის

ხელშეკრულებით ნაკისრი ვალდებულებები მოსარგებლის წინაშე სრულად, ჯეროვნად და კეთილსინდისიერად.

13. სადაზღვევო პროგრამის ფარგლებში, სადაზღვევო პოლისების გაყიდვისთვის გასაცემი საკომისიოს ოდენობა არ უნდა აღემატებოდეს პროგრამის №1 დანართით განსაზღვრული ფიქსირებული სადაზღვევო ტარიფის 20%-ს.

14. მზღვეველის მიერ ამ მუხლის მე-13 პუნქტით გათვალისწინებული ვალდებულების დარღვევის შემთხვევაში, ინფორმაცია წარედგინება სსიპ - საქართველოს დაზღვევის სახელმწიფო ზედამხედველობის სამსახურს შესაბამისი რეაგირებისათვის.

მუხლი 6. დამზღვევის მიერ სადაზღვევო პრემიის გადახდის წესი დამზღვევი ვალდებულია, სადაზღვევო პოლისით გათვალისწინებული სადაზღვევო პრემიის ნაწილი გადაიხადოს პოლისის გაცემისთანავე. სადაზღვევო პრემიის დარჩენილი ნაწილის გადახდას უზრუნველყოფს სააგენტო №1 დანართის შესაბამისად.

მუხლი 7. დაზღვევის მოქმედების პირობები

1. დაზღვევის მოქმედების პერიოდში ცალკეულ სასოფლო-სამეურნეო კულტურათა მიმართ მზღვეველის ვალდებულება ძალაში შედის:

ა) ერთწლიან კულტურებთან მიმართებაში, თუ სადაზღვევო რისკი მომხდარია მას შემდეგ, რაც ნაკვეთზე ჩატარებულია შესაბამისი სასოფლო-სამეურნეო კულტურის აგროწესებითა და აგროვადებით გათვალისწინებული ყველა საჭირო ღონისძიება, სასოფლო-სამეურნეო კულტურის 90% თანაბრად აღმოცენებულია და იმყოფება სავეგეტაციო

პერიოდის მიწისზედა ორგანოების (მინიმუმ 10 სმ) განვითარების ფაზაში და მოქმედებს მოსავლის აღებამდე; სანერგე მასალის (ჩითილი) დარგვის შემთხვევაში – სანერგე მასალის (ჩითილის) ღია გრუნტში გადარგვიდან არა უადრეს 10 კალენდარული დღისა;

ბ) მრავალწლიან კულტურებთან მიმართებაში, თუ სადაზღვევო რისკი მომხდარია მას შემდეგ რაც:

ბ.ა) ხილი – დაზღვეულ ტერიტორიაზე ხეებზე ნაყოფის 50% მიაღწევს 0.8 სმ-ს დიამეტრში, გარდა ბლისა, ალუბლისა და თხილისა, რომელთა შემთხვევაშიც დაზღვევა ძალაში შედის იმ მომენტიდან, როცა ნაყოფი მიაღწევს 0.4 სმ-ს დიამეტრში;

ბ.ბ) კენკრა – მცენარეს გავლილი აქვს ყვავილობის ფაზა, ნაყოფი ხდება მკვეთრად გარჩევადი და ფორმირებულია ბუჩქზე;

ბ.გ) ყურძენი - გამოტანილია მტევანი (როდესაც მტევანი გაშლილი და ვიზუალურად გარჩევადია).

მუხლი 8. დაზღვევის მოქმედების შეწყვეტა

დაზღვევის მოქმედების შეწყვეტის საფუძვლებია:

- ა) მზღვეველის მიერ ნაკისრი ვალდებულებების სრულად შესრულება;
- ბ) სადაზღვევო პოლისის ვადის გასვლა;
- გ) მოსავლის სრულად აღება დაზღვეული ტერიტორიიდან;
- დ) მოსავლის ტექნიკური სიმწიფის დასრულება;
- ე) მოსავლის ან სარგავი მასალის (ჩითილი) სრული განადგურება;
- ვ) საქართველოს კანონმდებლობითა ან/და პროგრამით გათვალისწინებული სხვა შემთხვევები.

მუხლი 9. ზიანის ანაზღაურება

1. სადაზღვევო შემთხვევის შედეგად მიყენებული ზიანისათვის მზღვეველის მიერ გასაცემი სადაზღვევო ანაზღაურების ოდენობა განისაზღვრება დაზღვეული ტერიტორიის ლიმიტის გამრავლებით ზიანის პროცენტზე, ხოლო დაზღვეული ტერიტორიის ნაწილის დაზიანების შემთხვევაში – დაზღვეული ტერიტორიის ნაწილის ლიმიტის გამრავლებით ზიანის პროცენტზე. ამასთან, მზღვეველის მიერ წინამდებარე პუნქტში მითითებული წესით გაანგარიშებულმა სადაზღვევო ანაზღაურებამ არ უნდა გადააჭარბოს რეალური ზიანის ოდენობას, მითითებული ორი სიდიდიდან იმ თანხას, რომელიც უფრო მცირე იქნება: სადაზღვევო რისკების ხდომილების შედეგად განადგურებული მოსავლის რეალურ ღირებულებას ან ნორმატიული ფასის მიხედვით გაანგარიშებულ ღირებულებას.

2. სადაზღვევო ლიმიტი მცირდება მზღვეველის მიერ გადახდილი სადაზღვევო ანაზღაურების ოდენობით.

3. განადგურებული მოსავლის რეალური ღირებულების გამოანგარიშებისას მხედველობაში მიიღება შემდეგი ფაქტორები:

ა) მიმდებარე ტერიტორიებიდან ანალოგიური სასოფლო-სამეურნეო კულტურის მოსავლის აღების პერიოდში მისი საშუალო საბითუმო ფასი მინდვრიდან შესყიდვისას;

ბ) სადაზღვევო შემთხვევის დღისათვის განსაზღვრული მისაღები მოსავლის ოდენობა.

4. როდესაც დაზღვეული ტერიტორია ან ტერიტორიის ნაწილი დაზიანებულია დაზღვეული რისკის შედეგად იმდენად, რომ მიკრო-

კლიმატური ფაქტორების და დაზიანების ხარისხის გათვალისწინებით მიზანშეწონილია გადათესვა/გადარგვა, მზღვეველი აანაზღაურებს გადარგვა/გადათესვის დადასტურებულ ხარჯებს, მაგრამ არა უმეტეს დაზღვეული ტერიტორიის ნაწილის სადაზღვევო ლიმიტის 20 % –ისა.

5. თუ გადათესვა/გადარგვა მიზანშეწონილია, მაგრამ დამზღვევი გადაწყვეტს, არ განახორციელოს გადათესვა/გადარგვა, მზღვეველი გასცემს სადაზღვევო ანაზღაურებას დაზღვეული ტერიტორიის ნაწილის სადაზღვევო ლიმიტის 15%-ის ოდენობით. ასეთ შემთხვევაში ტერიტორიის ამ ნაწილთან მიმართებაში დაზღვევა წყდება. დარჩენილ დაზღვეულ ტერიტორიასთან მიმართებაში სადაზღვევო ლიმიტი მცირდება პროპორციულად.

6. დამზღვევი უფლებამოსილია, სადაზღვევო შემთხვევის შედეგად დაზიანებული დაზღვეული ტერიტორიიდან აიღოს მოსავალი მზღვეველთან ზიანის ოდენობაზე დადებული წერილობითი შეთანხმების გაფორმების შემდეგ.

7. თუ აღმოჩნდება, რომ დაზღვეული ტერიტორიიდან მისაღები მოსავლის ღირებულება უფრო მეტია, ვიდრე პოლისში დაფიქსირებული სადაზღვევო ლიმიტი, სადაზღვევო ანაზღაურების ოდენობა პროპორციულად შემცირდება.

8. თუ ერთი დაზღვევის ობიექტი დაზღვეულია რამოდენიმე მზღვეველის მიერ, კონკრეტული მზღვეველის მიერ გადასახდელი სადაზღვევო ანაზღაურების ოდენობა გამოითვლება სადაზღვევო დაფარვის მთლიან მოცულობაში მისი წილის პროპორციულად.

9. თუ სადაზღვევო შემთხვევის მომენტისთვის ვერ ხერხდება მიწის ნაკვეთის დაზიანების პროცენტზე შეთანხმება, შეჩერდება ზიანის დარეგულირება ამ მაჩვენებლის დადგენამდე. ასეთ შემთხვევაში

შესაძლებელია, დაინიშნოს განმეორებითი ექსპერტიზა/მოწვეული იქნეს დამოუკიდებელი ექსპერტი, რომელთან დაკავშირებული ხარჯი თანაბრად იქნება განაწილებული დავაში მონაწილე პირებზე.

მუხლი 10. სააგენტოსა და მზღვეველის უფლება—მოვალეობები

1. სააგენტო უფლებამოსილია:

ა) მოსთხოვოს მზღვეველს ნებისმიერი

ინფორმაციის/დოკუმენტაციის წარდგენა, რაც დაკავშირებულია სააგენტოს თანადაფინანსებასთან ან პროგრამის მიმდინარეობასთან;

ბ) ნებისმიერ დროს, მზღვეველთან ან დამზღვევთან წინასწარი შეთანხმების გარეშე, განახორციელოს დამზღვევის/მოსარგებლის, დაზღვევის ობიექტის და მზღვეველის მიერ ხელშეკრულებით ნაკისრი ვალდებულებების მონიტორინგი პირადად ან დამოუკიდებელი სპეციალისტების/ექსპერტების და/ან აუდიტორების მეშვეობით, რაც მოიცავს, მაგრამ არ შემოიფარგლება საველე და დოკუმენტური მონიტორინგით;

გ) დამზღვევის მიერ დასაზღვევი ტერიტორიის ხელოვნურად შემცირების/დაყოფის ან/და დაზღვევის ობიექტის შესახებ არასწორი ინფორმაციის მიწოდების ან/და პროგრამის საფუძველზე სუბსიდიის მიღების უფლების შესახებ არასწორი ინფორმაციის შემთხვევაში, დააკისროს დამზღვევს ჯარიმა სააგენტოს მიერ გადახდილი პრემიის ორმაგი ოდენობით. ამასთან, ასეთ პოლისთან მიმართებაში მზღვეველი თავისუფლდება ნაკისრი ვალდებულებებისგან სრულად და მას არ წარმოეშობა დამზღვევისათვის გადახდილი სადაზღვევო პრემიის დაბრუნების ვალდებულება;

2. სააგენტო ვალდებულია, გადაიხადოს სადაზღვევო პრემიის №1

დანართით განსაზღვრული შესაბამისი წილი, წინამდებარე პროგრამით განსაზღვრული პირობების შესაბამისად.

3. მზღვეველი უფლებამოსილია:

ა) დაზღვევის ხელშეკრულების მოქმედების განმავლობაში, ნებისმიერ დროს, თავად ან დამოუკიდებელი ექსპერტის მეშვეობით, მოახდინოს დაზღვევეული ტერიტორიის შემოწმება. შემოწმების შედეგად შეადგინოს დათვალიერების აქტი, რომელსაც ხელს აწერენ მზღვეველი ან მისი უფლებამოსილი წარმომადგენელი და დამზღვევი/მოსარგებლე;

ბ) მოსთხოვოს დამზღვევს ყველა იმ დოკუმენტის წარდგენა, რომელიც აუცილებელია სადაზღვევო შემთხვევის, სადაზღვევო ინტერესის დადგენისა და სადაზღვევო ანაზღაურების მოცულობის განსაზღვრისათვის;

გ) არ აანაზღაუროს ზიანი, თუკი შემთხვევის დადგომის შემდეგ დადგინდება, რომ დამზღვევი/ მოსარგებლე არ იყო უფლებამოსილი მიეღო პროგრამით განსაზღვრული სუბსიდირება.

4. მზღვეველი ვალდებულია:

ა) ზიანის დადგომის შესახებ შეტყობინების მიღებიდან მზღვეველსა და სააგენტოს შორის გაფორმებული ხელშეკრულებით განსაზღვრულ ვადაში უზრუნველყოს დაზღვეული ტერიტორიის დათვალიერება და დათვალიერების აქტის შედგენა;

ბ) დამზღვევს შესთავაზოს მხოლოდ წინამდებარე პროგრამით განსაზღვრული სადაზღვევო პირობები;

გ) შექმნას პროცედურა, რომელიც უზრუნველყოფს დამზღვევის/მოსარგებლის უფლებას შეუფერხებლად დაუკავშირდეს ან შეხვდეს მზღვეველის წარმომადგენელს სადაზღვევო მომსახურებაში

არსებული პრობლემების გადაჭრის მიზნით;

დ) დაზღვევა განახორციელოს (გასცეს სადაზღვევო პოლისი) თითოეული კულტურისათვის სააგენტოსა და მზღვეველს შორის გაფორმებული ხელშეკრულებით დადგენილი ვადების შესაბამისად.

დანართი № 1					
სასოფლო-სამეურნეო კულტურა	სააგენტოს თანამონაწილეობა	დამზღვევის თანამონაწილეობა	ფიქსირებული სადაზღვევო ტარიფი	ნორმატიული ფასი ლარი/ჰა.	ნორმატიული ფასი ლარი/კგ.
მარცვლეული კულტურები					
ხორბალი				1,500	0.5
ქერი	60%	40%	6.5%	1,320	0.6
სიმინდი				2,250	0.5
პარკოსანი კულტურები					
ლობიო				3,400	2
მზესუმზირა	60%	40%	6.5%	2,300	1
სოიო				2,500	1
ბოსტნეული კულტურები					
ბადრიჯანი				15,000	0.5
წიწავა				15,000	0.5
კომბოსტო				11,400	0.3
პომიდორი				12,000	0.4
კიტრი				13,500	0.5
კარტოფილი				15,000	0.6
ხახვი				12,500	0.5
ნიორი				14,400	1.8
სტაფილო				16,250	0.65
ჭარხალი				15,000	0.5

ბალტიული კულტურები					
საზამთრო	60%	40%	10.5%	10,000	0.25
ნესვი				10,000	0.4
ვაზი	40%	60%	8.5%	12,000	1.2
ხეხილი					
ვაშლი	60%	40%	8.5%	20,000	0.8
მსხალი				16,000	0.8
კომში				16,000	0.8
ბალი, ალუბალი				24,000	1.5
ატამი				13,800	0.6
გარგარი				22,500	1.5
ქლიავი				14,400	0.9
კენკროვანი კულტურები					
მარწყვი	60%	40%	10.5%	12,600	1.4
ჟოლო				15,000	2.5
მოცხარი				15,200	1.9
მოცვი				28,000	3.5
კავლოვანი კულტურები					
თხილი	60%	40%	6.5%	6,600	3
კავალი				18,000	4
სუბტროპიკული კულტურები					
კივი	60%	40%	10.5%	18,000	1
სუბტროპიკული ხურმა, კარალიოკი				12,000	0.6
ფეიხოა				12,000	1.5
ციტრუსი					
მანდარინი	60%	40%	8.5%	10,000	0.5

ლიმონი				14,450	0.85
--------	--	--	--	--------	------

შენიშვნა:

იმ სასოფლო-სამეურნეო კულტურის დაზღვევა, რომელიც აღნიშნული არ არის დანართში, მოხდება მზღვეველის, დამზღვევისა და სააგენტოს შეთანხმებით.